

06 MAY 1996

MAHATHIR GESA INDUSTRI KURANGKAN PERGANTUNGAN KPD PEKERJA ASING

KUALA LUMPUR, 6 Mei (Bernama) -- Perdana Menteri Datuk Seri Dr Mahathir Mohamed hari ini menggesa industri-industri Malaysia supaya beralih kepada automasi dan robotik untuk mengatasi kekurangan tenaga manusia dan pergantungan kepada pekerja asing.

Semasa menggesa industri-industri kurang bergantung kepada pekerja asing, beliau berkata adalah tidak sihat bagi Malaysia, dengan penduduk sebanyak 19 juta orang, mempunyai sejuta pekerja asing.

Sementara rancangan-rancangan pembangunan Malaysia yang lalu telah berjaya mengujudkan pekerjaan, ia telah menyebabkan kekurangan buruh, tambahannya.

Beliau berkata automasi dan robotik haruslah menjadi jawapan untuk mengatasi kekurangan buruh sekarang.

"Pekerja-pekerja asing mungkin mudah dikawal hari ini tetapi jika mereka terus berada di sini, keadaan mungkin tidak sama lagi," kata Perdana Menteri semasa dialog tiga jam dengan para usahawan tempatan dan asing di sini.

Semasa dialog itu, soalan-soalan ditimbulkan berkaitan dengan keadaan buruh yang ketat, dasar-dasar percukaian, levi RM100,000 ke atas rakyat asing yang membeli harta di sini dan masalah perumahan kos rendah.

Menyentuh mengenai defisit imbalan pembayaran, Dr Mahathir berkata penyelesaiannya adalah mudah. "Kita perlu mengeksport lebih daripada import."

Tambah beliau: "Rancangan Malaysia Ketujuh (1996-2000) adalah seperti tembok pemisah bagi kita. Kita perlu meningkatkan eksport ke pasaran dunia."

Pengeluar-pengeluar domestik tidak harus mejadikan pasaran tempatan sahaja sebagai sasaran, katanya, sambil menyebut pada 1995, Malaysia mencatat jumlah perdagangan sebanyak RM152 bilion, menjadikannya salah satu daripada 17 kuasa terpenting di dalam ekonomi dunia.

"Kita mesti melihat ke Jepun dan Jerman, dan mempelajari kejayaan mereka dalam kemampuan mengembangkan eksport mereka dengan pertumbuhan penduduk yang kecil," katanya.

Sambil membayangkan wawasannya mengenai sebuah kilang futuristik, Dr Mahathir berkata: "Anda buka jentera di kilang sebelah petang dan pada pagi berikutnya barangan telah siap."

Para pekerja Malaysia adalah rajin dan mudah dilatih untuk mengendalikan teknologi baru, katanya, sambil menambah: "Kita perlu pekerja yang mempunyai kemahiran untuk menyelia, menyenggara dan membaiki kelengkapan pengeluaran moden." -- BERNAMA

JSM OS SIA